



## QVÆSTIO MEDICA

Quodlibetariis disputationibus manè discutienda in  
Scholis Medicorum die Jovis 2. Decembris.

M. PHILIPPO MATHON, Doctore Medico, Præside.

*An Opium hystericæ accessioni noxium?*

I.

**Q**UÆ vaporum nomine circumfertur affectio, in fœminis hystérica, in viris hypochondriaca dicitur. Non libidinis semper, sed sapientiæ interdum morbus, & literatorum atque sedentium ad libros miserum stipendium. Hoc affectu in hominum ore nihil crebrius; eum aliis revera patientibus & detestantibus; simulantibus aliis quasi ingenii comitem & fœturam. Quin imò nonnulli Medici quicquid inusitati moris occurrit in morbis, hocce titulo statim insigniunt: an ut imperitiam occultent suam? an ut adulentur ægris, quibus blandiendo imponunt facilius? an ut famam aucupentur? ad Deum propius accedit nihil quàm ejuscemodi symptomatum factio. Fœminæ tanti mali insultibus magis obnoxia; num quodd earum acrius sit ingenium, aut potius anima debiliior, magisque pateant animi commotionibus, atque uterum corporis sentinam sortita sint, clarè non liquet. Minus adhuc perspecta hystericæ affectionis indoles. Prothei instar innumeras induit formas, nec sibi usquam constat. Malè uteri suffocatio & strangulatus nuncupatur. Citra ullam apnœam quandoque sævit paroxysmus, quem nec infert sanguis in pulmonem confertim irruens, & ejus motum intercipiens. Exangues ille non minus quàm sanguineas corripit, chlorosi laborantibus etiam familiaris, quarum sanguis stagnans & ad efferuescendum ineptior. Illius tamen crebriora symptomata, sunt faucium constrictio, interceptio spiritus cum suffocationis metu, globi cujusdam velut ex imo ventre ascendentis sensus, ructus, nausea, vomitus, palpitatio, animi deliquium. Sæpius etiam brachiorum, crurumque varij motus convulsivi, capitis distortiones, fletus, risus alternatim insequuntur. Auctà nonnunquam morbi malitià, ingerunt deliria, convulsiones cum spumâ per os expressâ, nec non soporosi affectus. Ad ultima ventum est, illis ubi comatosa accedit affectio, quæ non semper

2  
vi morbi, sed & narcoticorum usu interdum inducta in Apoplexiam degenerat.

II.

**T**OT symptomatum parens & author unus halitus è præcordiis, potissimum tamen è liene & uterò erumpens: focus in cerebri ò ne queras: hoc tamen culpæ non omninò expers; pro variâ ejus constitutione citius vel gravius affligit malum. Quidquid sensui, aut imaginationi fortius & vehementius oblatum est, ut æz non ferunt, quibus à naturâ, vel morbo, aut vigiliis spiritus sunt imbecilli & fugaces; ita vel levissimò maligna hujus auræ afflatu quatuntur. Quibus contrâ spiritus sunt vegeti, firmaque nervosi generis temperies, illius occursum nihil aut parùm accedit incommodi. Sic juvenes robusti ac valentes serotini aëris non sentiunt injurias, quibus senes effecti miserè oblaeduntur. Ad augendum etiam minuendum vè paroxysmum non parùm facit ingestorum conditio. Calidiora, ut Theriaca, Mithridatium, nonnullos halitus discutiunt quidem, sed è focò concalefactò & exagitato longè plures evehunt, quibus aut protrahitur, aut invalescit accessio. Humores mali fomites conclusos reverà coercent Narcotica: at spiritibus densâ nocte circumfusis, sive cataphorici, sive paraphorici, vel convulsivi infestent affectus, non sine periculi suspitione usurpantur. Si eorum usu non rarò Lethargum incurrit mulier phrenitica, quanto citius ea quæ ab uterò furit, in cujus perniciem narcoticus vapor cum hysterico simul conspirat. Hic ut pote melancholici humoris soboles, quandiù sui juris est, spiritus hebetat & confopit. Quibus verò interdum armatus est spiculis, membranas pungit, & convulsionem movere, spiritus vitrioli in nolum, qui licet sanguini permixtus coagulationem ejus efficiat, nervos nihilominus feriens, spasmos invehit. Idem etiam vapor vehementius effrenatiusque commotus quasi pristinae actionis oblitus, furias concitat, quò pacto ipsamet narcotica liberalius congesta nonnunquam ægros in furorem præcipientes agunt. Hujus autem effrò impetu seu sponte, seu arte cohibitò, veluti suæ redditus indoli sensus denuò terrâ offundit caligine. Hinc Melancholici fiunt ut plurimum Epileptici; Epileptici contrâ melancholici, nec non aliquando Apoplectici. Hinc hystericas convulsiones, & deliria vulgò excipit sopor, interdum etiam Catoche, vel saltem frigoris & stuporis cujusdam sensus è capite per cervicem in scapulam & brachium descendens; elapsò nimirum humore è muliebribus locis, cujus præsentia fovebatur accessio. Porrò si concitatori halitus hysterici motu spontè sedato, tot adhuc calamitates subsequantur, quot metuendæ, ubi ad eum coercendum offeruntur Narcotica, quorum dosim sicut & unius cujusque temperiem assequi difficile ac per arduum!

III.

**G**RAVITER hallucinantur qui hystericum affectum derivant à ferosâ colluvie nervorum principio inhirente, vel à spiritibus animalibus occursum materiæ heterogenæ in cerebro effertis, & pyrii pulveris ritu explosis, atque hinc inde per nervos dissilientibus. Ad stupendos saltus quibus hysterica interdum jactantur, non opus hac fictitiâ spirituum animalium vibratione. Nudatus tendo, si specillo vel blandissimè attingitur, totum corpus in-

3

horrescit, atque concussionē illicō subortā aliquandiu obrigescit. Superarum quidem partium vitia nonnunquam iniquē infernis tribuuntur, ut in vomitu quem ciet cerebri concussio: at quantum convulsivi motus à cerebro prodeuntes, ab hysteriis distant? illi nusquam, nisi præviis oculorum coruscatione, aurium tinnitu, aut vertigine, invadunt: hi verò nisi prænuncio sensu cuiusdam auræ frigida ex inferâ regione ascendentis, & ubi partes subjectæ ulcere, aut infarctu detinentur, & solemnē aliqua evacuatio subsistit. Procul exulent quinomen vaporis inane & fictitium esse putant; ille non tantum per venas aut arterias, sed per cæcos ductus ventriculum, diaphragma, œsophagum, trachæam arteriam prætergressus ad mentis arcem irrepit, quidquid nonnulli reclamant nihil ab ore ad eam traduci, tenuissimò vini spiritu affuso sellæ sphenoidæ, quam non pervadit. Delibato vini generosi haustu, illicō rescinduntur vires, priusquam ejus particulæ commeatu sanguinis illic devellantur. Verùm hysterica accessionis causa sive per latentia spiracula, sive duntaxat per sanguinis canales deferatur, mentem semper obscurat, atque non solum vi narcoticorum, sed pro eorum conditione malignior evadit. Horum variæ species. Alia benigniora sunt: alia vehementiora ad quæ revocatur opium omnium maximè infidum & periculosum.

#### IV.

**O**PIUM succus viscidus è papaveris sativi incisō capite guttatim stillans brevique concreescens, non est Maslach Turcarum, quod ex pulvere foliorum, & seminis Cannabis vulgaris apud eos Asfar dictæ concinnatum est. Utrumque apud Orientis incolas crebrò usurpatur; at illud nusquam impunè; hoc verò tutius. Ne credideris Maslach ad libidinem duntaxat stimulare, & ad bella accendere, instar vini potantium naturæ se se accommodantis, interdum venerem aut furorem, aliàs melancholiam, taciturnitatem, somnum vè inducit. At verò Opium Maslach seu Amphiam sit necnè, quantum dispar ab eò, quod in officinis prostat: illud ad drachmam singulis diebus leviori sanitatis dispendiò: hoc ad granum usque vix securè oggeritur. Pro narcosi sæpe necrosim accersit. Quàm à veterum opiò ut pote candidò, nostrum etiàm diversum est! Si quam quietem conciliat, peregrinis atque lymphaticis ea conturbatur insomniis miseram animam exagitantibus. Eò assumptò quid aliud lucrit? Sensus tantummodò deluduntur, morbi causâ foras non expulsâ. Præstatet morbo desinere quàm ejusmodi decipi, suspensâ perniciæ cum fœnore mox furenter erupturâ. Quâcunque arte, vel torrefactione, vel Acidis, vel moschò, ambrâ, margaritis, salibus volatilibus, aromatis præpares, nusquam ejus malignitatem correxeris. Quanto majori vi præstat cæteris narcoticis, tantò nocentius gerit in sinu virus. Fabulæ sunt humores ab eò aliàs fisti, aliàs promoveri: imò lochia suppressa sedatò deliriò, feliciter ejus operâ aliquandò erumpere. Consulant Neoterici inanes suas figuras, quæ non minùs sunt obscuræ, quàm occultæ qualitates, in quas tamen adeò acriter insurgunt, & invehuntur: tamque varios explicent effectus ii scilicet, qui se solos putant universæ naturæ interpretes.

**S**OLA plerisque hysterice venus medela est. Ingrata sunt, & infida cœtera penè remedia. Si quæ conjugio non levantur, corjugi id debent, cui uxor laboriosa nimis possessio est. Nec aliis artibus libidinem reprimes. Sal Saturni morbum priore deteriore committit. Nullum alimentum in quò non lateat quoddam amoris spiculum. Ipse Apollo herbarum dominus ejus œstrò percitus, veneri litat. Usque adeò res venerea blandum est malum, quod faciliùs accusare, quàm vitare. Quæ naturæ sacra non facit, longe majora eam manent incommoda, furor, desperatio, Dæmonomania, quæ vix quemquam laborare audias præter cœlibes, & virgines non ampliùs Dæmonem mentituras, si quod exorcismo fuerit proximum, nubere liceat. Sola ferreas mentes libido domat, quæ majorem in virginibus patitur famem, dum dulciùs putant, quod nesciunt. Quod si præ votò, vel viduitate suavem hanc Medicinam degustare non detur: sanguinis missio celebretur è saphoenâ, sicut & cœteris hysterice suppressâ solenni evacuatione, vel obstructione laborantibus. Cucurbitulæ femoribus affigantur. Oleum Gagatis, & Succini, atque sal armoniacum plus celebratius habent, quàm salubritatis. Accessione sedatâ purgatio per epicrasim, balneum, lactis serum, tinctura martis, cum jusculis cichoriò, agrimoniò, scolopendriò alteratis, thermæ, acidulæ. Hisce præidiis aliquandiu administratis, etiamsi ægræ meliùs se non habeant, Opii nusquam periculum feceris. Eæ sibi per aliquod tempus relinquendæ. Melancholici morbi nequecti / sæpè leviores evadunt, mirumque ad aliquid conferre negligentiam, cum aliàs indulgentia morbum producat.

*Ergo Opium hysterice accessioni noxium.*

**Domini Doctores disputaturi.**

*M. Ioannes Cordelle.  
M. Petrus Ozon.  
M. Guillelmus Lamy.*

*M. Petrus Yon.  
M. Antonius de Saint-Yon.  
M. Claudius de Quantéal.*

*M. Rolandus Merlet.  
M. Stephanus le Gaigneur.  
M. Petrus Bourdelot.*

Asserebat Lutetiæ **FRANCISCUS LE RAT**, Sylva-  
nectinus. A. R. S. H. 1677.

**PARISIIS**, Apud Franciscum Muguet, Regis & Illustrissimi  
Archiepiscopi Parisiensis Typographum.